

( بالاشلی لی لار حیکایه توپلوسوندان )

# اوچ بارماق

## محمد صبحدل

و بو شیدیرغی یاغیش ائله خییاوانلارین قوتور اوزلرینه، تیکینتی لرین  
اوجا هئیکل لرینه، قنولارین-قالدیریملارین چاتلامیش جدول لرینه و  
بوتونلوکده شهرین پیسرینه چیرپدی و چالالاردا قالانیب، گؤل  
اولوب، داشماغا باشلادی کی؛ احد جابارزاده سو داملالارینین او پاییز  
آخشامیندا، تهران کیمی بویوک بیر شهرین بوتونلویونو یویوب  
آپارماق قصد ائله دیکلرینی، ظنن ائتدی. البته احد جابارزاده بو  
یاغیشدان بترلرینی گورموشدو؛ اوزوده تهران کیمی نهنگ بیر شهرده  
یوخ ائله بالاشلی نین اوزونده و بالاشلی کیمی بالاجا بیر کندی یویوب  
آپارا بیلمه یین یاغیش، بو عظمتده بیر یئری نجه آپارا بیلردی. حیاتین  
ان عادی حادیه لری بو عظمتین یانیندا داها عجایبیه چئوریلیب، بو  
بویوکلویون اؤنونده ائعتیناسیز جاسینا چیرپان داملالار داها گوجلو داها  
جسارتلی گورونوردولر. احد سودان قاچان دئییلدی و اوزاق بیر پاییز  
آخشامینی خاطر لاما قیمتینه یاغیشدا ایسلانیب، سویوق دهیمه یه ده،  
دؤزه بیلردی. آما بویوک یئر، ایتی آدیملار طلب ائدیردی و بیر آزدا

یوبانسایدی، ایشینی الدن وئرمه یه جکدی آما سۆز یئری اولاجاقدی و احد بو سۆز یئرینین اولماسینی آتاسیندان دا بئله چکه بیلیمیردی.

□□□

مئترو دا نظافتچی ایشله مه یی اوچ آی-دوققوز گون اولوردو و بو اوچ آی-دوققوز گون بیر جوره اونون یاشاییشیندا آچیلش-ساکینلیک گونلرینین باشلانماسی سایلا بیلردی. هر نه اؤز ریوالیندا ایدی و احد هئچ بیر حادثه نین بو ریوالی پوزماسینی ایسته میردی. دونیسی بیر قیز اؤزونو قاتار آلتینا آتمیشدی. احدین ایش شیفتی اولمادیغیندان، ماجرانی گۆرمه سه ده، مئترونون فعال کامئرالاری صحنه نی بیغمیشدیلار و او آغ مانتولو قیزین قاتار آلتینا آتیلماسی دؤنه لرله جیب تئلفونلاریندا گؤستریلیب، ال به ال گزیردی. آغ مانتولو-چهرایی لئچکلی قیز، جاماعات آراسیندا چوخ عادی ائله جاماعاتین بیرسی کیمی گؤرونوردو. قاتار گلنده ده ائله جاماعاتین بیرسی کیمی قاتار خططینه یاخینلاشیردی، لاکین هامی کیمی خططین دالیندا دایانمیردی. خفیفجه دوروخوردو و قاتار ایکی-اوچ مئتیرلییه یئتیشرکن، سکی دن قاتار قاباغینا آتیلیردی و..

احد فیلمی گۆرمک ایسته میر. بئله سی خبرلری هر گون گونده-لیکلرین حادثه لر صحیفه سینده اوخوماق اولور. داها اولومه فیکیرلشمک دن بئزیم. تزه ایش تاپیب و سه مانا چیخماق ایسته بیر. هئچ شراییطاله بو سیخینتی دان قورتولدوغو اوچ آی-دوققوز گونون حیسینین اوره بیندن سیلینمه سینه راضی دئیل. هله سولطه دن قورتولماغی، اؤز آیاغی اوسته دورماغی، اؤز اولماغی تزه جه دیور.

آتاسیلا سویو بیر آرخا گئتمه میشدی و اؤیرنجی لیینی کئچیردی  
تئهراندا آوارا دولانیب، دانیشگاه ایلرینده تانییب، عسگرلیکه  
دوستلاشان ابهرلی دوستو؛ یوسفون، موجرردی اوتاغینا سیغینماغی،  
آتا ائویندن اوستون توتوموشدو.

یوسفو ۱۳۷۸-جی ایلین اؤیرنجی لیک تحررو کاتیندا توتولدوقدا  
تانی میشدی. هامینی بیر یئرہ بیغمیشدیلار و او بؤیو کلوکده زالین  
ایچینده آداملار تکم-سئیرک اوزانیب، اوتوروب، دولانسالاردا، گاهدان  
میرتا، گویا، بوش-بوغازلیغا باسسالاردا، قیریشمیش آلین لاردان  
فیکیرلرین هارالاردا سئیر ائتدیکلرینی سئزمک اولوردو. سیزیلتی لار،  
هنیرتی لر، اوچ دؤرد نفرلیک هیجانلی سیاسی موباحیثه لر، گاهدان سا  
ناشیلیقلا یاواشجادران اوخونان نئچه نفرلیک کورال میلی ماھنیلار  
قاریشدیقدادامین ایچینده هانسی آد آپارا بیلمه دیی حیسی  
اویادیردی. ائله همین سسلرین ایچینده دوداق آلتی اوخونان تانیب  
آذربایجان ماھنیسی، احدی اون-اون ایکی یاشلارینا و بالاشلی نین  
قیزمار گونشی آلتیناجان آپارمیشدی.

فیکریندن گئجه لر یاتا بیلیم  
بو فیکری باشیمدان آتا بیلیم  
نئیله بیم کی سنه چاتا بیلیم  
آیریلیق آیری...

- باخ گؤر نئینه دین؟ دونومو خارابالادین. ائششه ح!

– منہ نہ؟ اوزون باش آششاغی قویموشدون جیبیوہ دە.

– خئیبرده سن دئسه یدین کی...

سحرین جیبینده احدین وئردیی قارا بیک خودکار قوسموشدو و احدی قووالایان سحر، اونو شووکت خانیمای یعنی احدین آناسینا چوغوللامیشدی. شووکت خانیم سحرین کونلونو اله الیم دئیہ-بالاما تزه دون تیکه جهیم- دئمیشدی و سحری باغرینا باسمیشدی. نه اولوب کی یویارسان گئدرده.

بونو احد دئمیشدی. و سحر دونونون دوش جیبینین جووهرلی حیصه سینا اوزوندن آرالایاراق، یاری اوزونه و یاری شووکت خانیمای-دا گئتمز کی-دئیہ اونلارا باخمیشدی. ائله باخمیشدی کی واختلی واختیندا سایمایان احدین یادداشیندا سونرالار محو بیر خاطرہ- یه چئوریلدیکده، ابدی بیر رسیم یاراتمیشدی و بو اوتری اوشاق دوشونجه سیله دئییلن «دا گئتمز کی» ایلر سونرا احدین دونیا گوروشونده یاشاییش فلسفه سینده درین آناملار قازانمیشدی.

سحرین آناسی زکییه، شووکت خانیمین صمیمی اوشاقلیق دوستو ایدی. بللی اولان آغیر یاشاییش کئچیرمیشدی و احد بونو اون-اون ایکی یاشینداکی دوشونجه سیله اونون-بونون پیچیلتی، قاش-گوز ائتمه و ایشاره سیندن دویموشدو. سونرالار احد بیلدی کی سحرین آتاسی سروان سولطانی اینقیلابدان قاباق قارد افسری اولدوغونا گوره آروادی زکییه یه خبر وئرمه دن اینقیلاب ایللیری گیزلنوب یوخا چیخمیشدی. اینقیلاب چاغیندا ایتکین دوشن آز دئییلدی و اری نین وضعیندن خبرسبز بویلو زکییه نچه آی بوش ائوده گوزله ییب الی

چاتیب چاتمایاندان خبر توتاندان سونرا تئهرانین او های-هارایبندان نه کؤکده اوژونو بالاشلی یا یئتیرمیشدی. سونرا سحر دوغولموشدو و سولطانی دان خبر اولمامیشدی. اونون دیری اولماغینا چتین اینانماق اولوردو. زکییه یه ائلچی گلن اولسادا- دؤزه جه یم-دئییه باشدان ردد ائله دی. دوز ایکی ایل خبرسیز قالدی، امما گؤزله دی.

ایکی ایلدن سونرا سولطانی یئنی دؤولتین افسرلیک پالتاریندا کنده دؤندو. ایسلام جومهوریتینین ارتئش افسری ایدی و ایراقلا تزه باشلانان موحاریبه جبهه لرینده دؤیوشوردو. کیمسه زکییه یه گلن ائلچی دن-زاددان سؤز دئییب اروادینین بویلولوغوندا خبرسیز سولطانی نین اوره یینی بولاندیرمیشدی. بو ظنن فاجیعه دوغورموشدو. زکییه شوککه اولدو و آتاسی بالاعمی سولطانی نی ائودن قوواراق-بو اوغراشین آدینی چکه نین نه کی وارینا لعنت- چئویردی،- ایتیل سوله- ندیین یئرله قورومساق!

زکییه اوژونو آلا دره سیندن آشاغی بیراخدی. یقین اهیه ر او زامان بالاشلی دا دا بیر مئترو خططی اولسایدی اوژونو قاتار آلتینا آتاردی. آلا دره سیندن قورتولماق چتین ایدی لاکین قاتار آلتیندان ماحال حددینده ایدی. زکییه اوژونو آلا دره سیندن آشاغی آتدی امما اولمه دی. بو حادیته اثرینده مشاعیرینی ایتیردی. داوا-درمان جاواب وئرمه دی و اورمو دلی خاناسیندا نظارت آلتینا آلتیندی. سحری ایسه زکییه نین آتا- آناسی بالاعمی و کولثوم خالا ساخالایردیلار.

او واختلار احد بونلاری بو آیدینلیقدا بیلیمیردی و تکجه شوؤکت خانیمین کنداروادلارینین بیريله دردلشنده «لاپ ائله بیل زکییه نین

اؤزودو» و «بو چؤلون تزهلییی ایدی یازیق زکییه» سؤزلرینی ائشیتیمیشدی. بللی اولان سحر، آناسی یئرینه، حؤرمت، گؤروردو. آروادلار سحری گؤردوکده کؤورکلنیردیله و بو کؤورهلمه سحره کند اوشاقلاری ایچینده بیر جوره نوفوذ، بیر جوره روتبه-مرتبه قازانديرمیشدی.

زکییه نظارت آلتیندا قالمالی ایدی. او واختلار کیمسه بو نظارتین ایلرله اوزانديغینی، فیکرینه ده گتیره بيلمزدی. شوؤکت خانیم کولثوم خالایا:- اؤلمه میشم کی؛ من ده سنین بیر قیزین باش چکهرم بيله سینه.- دئمیشدی و البته نئچه دفه دن آرتیق اودا اوول ایلرده باش چکه بيلمه دی. دوغروسو احدین آتاسی موصطافا جاببارزاده قویمادی.

سولطانی جبهه یه قاییتیمیشدی. او ایتکین دوشدویو ایکی ایلدن هئچ واخت وهئچ کیمه سؤز آچمادی و سککیز ایل موحاریبه بیتینجه ده شهره دؤنمه دی.

سونرالار احد عؤمرو بویو یعنی اویرنجی لیکده، عسگرلیکده و مئترودا نظافتچی ایشله ینده ده، بوتون نیظامی گئیملی آداملارین قیافه- لرینده، قیریشیقلا ریندا و شستلی لیپینده بو اصلن گؤرمه دییی سولطانی نی ایزله میشدی.

موحاریبه بیتن دن سونرا دا، سولطانی کنده دؤنمه دی، دؤنسه ده احد ایلین تکجه اوچ آی یاریمی بالاشلی دا اولوردو و اوجور کی گرک، کند یاشاییشیندا عادی اولدوغو کیمی، حادیتهلری ایزله یه بيلمزدی. آنا طرفیندن بالاشلی دان اولسادا اورمودا دوغولموشدو و بالاشلی داکی یئر-مولک لرینه تکجه حاصل و اختی کؤچوردولر. آتاسی موصطافا

زھملى بىر كىشى ايدى. يئتىم بۇيويوب، اۋز آياغى اوسته دورانلاردان و نئجه كى دئيه رلر حئساب-كىتاب آدمى ايدى. بالاشلى دان دئىيلدى و اوتوز ايل مالييه ده ايشله دىكدن سونرا تقاعوده بوراخيلمىشدى. زكويه اوسته شووكت خانيم لا داوا-شاوا سالدىقدان سونرا بالاشلى لى لارلا رابيطه لرىنى آزالتمىشدى. موصطافا جابارزاده بئله بىر كىشى ايدى. احدىن اوشاقلغى شووكت خانيم لا موصطافا كىشى نىن دئيشمه لريله كئچمىشدى. هميشه آجى لىق اولموشدو، آما حاصىل واختى يعنى ايش واختى باشلار ايشه قارىشدىقدا داوا-شاوا ائله آزالىردى كى ايلده او بالاشلى دا قالدىقلارى اوچ آى يارىم؛ عاييله نىن ان شىرىن چاغلارىنا چئوريليردى. ان آزى احد بئله دوشونوردو و بو دوشونمه اونون دوشونجه سىنده بالاشلى يا مخصوص بىر حورمت-لىاقت قازاندىرمىشدى. موحارىبه بيتدى و سروان سولطانى كنده دؤنمه دى، دؤنسه ده احد بىلمه دى؛ يعنى بو حاقدان نئچه ايپهاملى سؤز ائشيتدى، آما او گنج ياشلارىندا اودا بالاشلى موحىطينده، سحر حاقدان سؤز-سوو خبر آلماسى بۇيوك حورمت سىزلىك سايىلاردى. داها بويلا-باشا چاتمىشدىلار و سحر ايله ائل ايچىنده سالاملاشادا بىلمزدى. سحرى سون دفة شووكت خانىمىن ياسىندا گورموشدو. كولثوم خالا ايله بىرگه گلمىشدىلر. بۇيوموشدو و ياشماقلانيردى. گوزآلتى بىر-بىرىنى نظردن كئچىرىب، اۋزگه لشدىكلرىنى حىسس ائتمىشدىلر. كولثوم خالا باش ساغلىغى دئمىشدى و گئتمىشدىلر. گورونور شووكت خانىمىن اولومو، كولثوم خالانى لاپ سىنسىتمىشدى. شووكت خانىمى قلب خسته لىيى اپارمىشدى. احد دوشونموشدو كى داها سحرى تانىمىر و بو گئتىكجه


اوزاقلاشان و دونيانين درينليكلرينده اونودولمايا جان اتان، گؤزآلتى باخيشلارى، داها يادداشيندا ساخالايا بيلمه يه جك. سحر اونون خاطرينده اوشاق قاليردى و بو بؤيويوب، ياشماقلانان قيز ايله هئچ ايلگى سى يوخ ايدى. سحر اونون اؤز ايچينده قويلادىغى حيصه لرين بيرينه چئوريلميشدى. و بلكه ده ائله بو قويلانماق، بو اوشاق سحرى، ۱۳۷۸-جى ايلين او ياي گئجه سينده، بالاشلى نين و اوشاقلينين جوره-جوره خاطرهلرى ايچيندن ان تئز يادينا گتيره بيلدى رسيمه چئورميشدى.

او گئجه احد بونلارين هاميسيني او ييغليديقلارى بؤيوك زالين ايچينده خاطرلاميشدى و بو خاطرلاما بير ياز ياغيشى وئردى تسكينليك كيمي، احدين ايضطيرابلى جانينا تزه ليك و يونگوللوک گتيرميشدى. او شراييطده خاطرهنين آجيسى دا-شيريني ده اونو كؤوره-لديردى، يونگول له ديردى و احد بو يونگوللشمه نى، دوداق آلتى «آيريليق، آيريليق» ميزيلدايان و چنه سينين آلتى تزه جه ضربه دن گووه رميش؛ يوسوفا مديون ايدى. لاکين او قارشىقليقدا هئچ نه ائده بيلمزدى. گؤزآلتى باشقا اؤيرنجى لرين دفه لرله يوسوف نصيرى يه موراجيعت ائتديكلرينى سئزميشدى و اونون اساسى ايشلره قارشىماسى بللى ايدى. تئز-گئج باشقالاريندان اونون آدينى آلاجاقديلار و اونو بو جمعى توتولانلاردان آيیراجاقديلار. سونرا سورغو-سوال باشلانا جاقدى و... احد بو ياشينا قدر زيندان گؤرمه سه ده بونلارى بير طبيعى غريزه كيمي قاباقجادان اوخويا بيلردى. غريزه اونو يوسوفا ياناشماغا ايجازه وئرميردى. او هئچ نه ائده بيلميردى أمما يوسوفدان ممنون ايدى و بو



ممنونلوق اوزرينده تكجه يوسوفون قيافه سيني يادداشيندا ساخاليا بيلردى.

سونرا يوسوفو آپاردىلار.



اوج گوندن سونرا احد تهران خياوانلاريندا سربست دولانيردى. نئچه آيدان سونرا درس قورتولا جاقدى و اونو ائودن و موصطافا كيشى نين سولطه سيندن ايجتيماعا چيخاران بو دؤرد ايل بيته جكدى. بو دانيشگاه ايللرى، آجى-شيرين اؤيرنجى ليين تامام حيسسلرى، دونيانين ايده آل و ايناملى-غورورلو يئونونه اينانديران چاغلارى دالدا قالا جاقدى.

احد گنده جكدى و دانيشگاه يئرینده قالا جاقدى. يئنى اؤيرنجى لر گله-جكلر. دانيشگاه قاباغينداكى كوچه لرى، پاساژلارى و چرچى لرين دؤشنديكلرى قالديريملارى الك-ولك ائده جكلر. آخشاملار قيزلى-اوغلانلى بزه نه جكلر و مودا باخان كيم، كئفه باخان كيم، دولانماغا چيخا جاقلار. ائو بوغونتوسوندان قورتولان جاوانلار بو بيردن وئريليمش آزادليق اؤنونده يونگوللنه جكلر. سئوه جكلر، سئويله جكلر. گوناها باتا جاقلار، پاكا چيخا جاقلار و زامان ائعتيناسيز جاسينا آتيني چاپا جاقدى. درسه گيريشن لرى ده و احد كيمي كؤهنه-تزه، آزاد-ياساق كيتابلار ايچينده هانسى گيزلى بير سيررى گزيب، باشى آغرييانلارى دا اولاجاقدى. اوخويا جاقلار، اؤيره نه جكلر و دونيا بويو بيتمه ين مسله لر اوزره موباحيئه-موجاديله كئچيره جكلر. ساواشا جاقلار، بير-بيريني توتدورا جاقلار، قورتارا جاقلار، قاچا جاقلار و يئنه ده گنده جكلر.

احد سربست دولانيردى و خياوان هميشه اولدوغو كيمي شولوغ

ایدی. تئلفون دککه سینده عیشوهلی بیر قیز اوجا سسله دانیشیردی. ائله دانیشیردی کی؛ جاماعات باخین من بیرسی ایله دانیشیرام. توکلری یاری یا قدر ماوی-یاشیل گوللو لئچکدن ائشیکده ایدی و دولو اندامینا تاریخ چکیلیمیش دار مانتوسونون قوللارینی دیرسه یه کیمی چیرمالامیشدی. احد قیزین صندل باشماقلاریندان لاکلی آیاق بارماقلاری و قیسا شالوارینین پاچاسینا قدر یاریم آچیق بالدیرلارینی نظردن کئچیردی. قالان حیصه لری تکمیللشدیرمک چوخ چتین دئییلدی. اؤیرنجی لیک دوستلارین موجرردی ائولرینده پورنو فیلمدن-زاددان گۆرسه ده قیز جاماعات اونا همیشه یاساق اراضی حئسابلانیردی. احد اؤزونو آغیر توتوردو. کیتاب-کاغیز ایله مشغول اولوردو و اوول دن؛ لاپ اوول دن یعنی اؤیرنجی لیکدن قاباق و حتتا سونرالار دفه لرله موساعید مؤوقئعییتی اولسادا بو یاساقلیغا توخونمامیشدی. بو یاساقلیق اونونلا دولانیردی، اونونلا گزیردی و اونون ایچینده ایدی.

احدجه بو یاساقلیغی پوزماغا درین دوغولو، عاطیفه لی بیر رابیطه یارانمالی ایدی. سحر ایسه اوشاق ایدی، اوزاق ایدی و احدین اوشاقلیغی و وارلیغینین بیر حیصه سی کیمی جینسیت سیز بیر خاطیره ایدی. قوهوملاردا-قونشولاردا و دانیشگاه قیزلاریندا دا بئله بیر قابیلیت نه آختارمیشدی و نه ده تاپمیشدی. او احد ایدی و احد ده قالمیشدی. یعنی تک ایدی و هئچ بیر اینسان بو احدلی ی پوزا بیلمیردی.

□□□

عسگرلییه گئتمه دن اؤنجه ایکی هفته نی اؤلرینده کئچیردی. آتاسی موصطافا، بالاشلی یئر-مولکونو ساتمیشدی و تقاعدله کئچینیردی. هئچ واخت وضعلری پیس اولمامیشدی، آما موصطافا ائله داورانیردی کی بئله وارلی-کارلی آدامین اوغلو بیر عؤمور کاسیبلق حیسی ایله بؤیوموشدو. ائوی قارا گؤتورسه ده هر یاندا شوؤکت خانیمین ایزی-اثری قالیردی.

آخشام اوستو ایکی فرانسه ایسته کان چیخاریب:

- چای ایچیرسن اوغول؟-سسله میشدی.

گؤرونور ائوین هئچ نه یینه ده یمه میشدی. هر نه آناسی واختی کیمی ایدی. فقط آناسی یوخودو. آناسینی قلب خسته لیی آپارمیشدی. موصطافا ایله بیر عؤمور ایختیلافلی یاشاماغینا گؤره اولنده هامی «جاننی قورتولدو» دئمیشدی لر. آنا اولومونو، ایستی یارانین سووودوقجا بللی اولان آغریسی کیمی چوخ گئج دوشونموشدو.

- چای ایچیرسن اوغول؟

- هه ایچیرم.

گؤرونور کیشی دانیشماق ایسته ییرمیش. دانیشدی دا. بیر تقاعوده چیخمیش قوجا ژئنرالین کئچیردی موحاریبه لریندن بحث ائتدی کیمی. اؤزوندن، چتینلیکله بؤیودویوندن و شوؤکت دن. احدین آرالی گزمه سیندن گیلئی لندی ده. شوؤکتین اولومو قوجا تمیشدی کیشینی. کؤوره لمیشدی، یوموشانمیشدی و داها آدامین یئریشینه، دوروشونا بند ائله مه یه ذؤوقو-حالی قالمامیشدی. بللی اولان آروادینی عجایب سؤیرمیش. شوؤکت اونون قلبینده بؤیوموشدو، یوکسلمیشدی و احد

بونو گۆردویو حۆرمتدن دویا بیلردی. آتاسیندان آجیغی گلמידی. یادینا گلن دن آتاسینی ائله بئله؛ بیر ژئرال کیمی، بیر سولطان هئیتینده گۆرموشدو. اونو بیر سولطان آتاکیمی اورهینده ایسته- میشدی ده، آما اونونلا صمیمی اولما بیلمه میشدی. ائودن آیریلیب، ایستقلال حیسی دویاندان بری داها سویو بو سولطانلا بیر آرخا گئده بیلمه دیی بللی ایدی. او قاچیردی. بو ائودن، خاطرهلریندن، اوشاقلیغیندان و بوتون داوا-شاوالی گونلریندن قاچیردی.

- نییه قویمادین آنام زکییه یه باش چکه؟

- زکییه؟ گرک قویایدیم؟ دوز ارواد دئییلدی کی. بی ناموسلوق ائله- میشدی اوغول..

احد داها دانیشمادی. آتاسینین ایلرله تربیت تاپمیش موجدیله غریزه سینی اویاتماق ایسته میدی. چیسکینلی اوزاق بیر پاییز گونونو خاطرلادی. گیزیله جه زکییه نین گۆروشونه گتدیکلری بیر گونو. اورمونون پاییزلاری ائله بئله اولوردو. قیزیانا گوللو-بزکلی چتیریندن جانی قورتولموشدو و تزه جه آلدیغی کیچیک قارا چتیرینی باشینا آچیب، آسفالت اوزره کیچیک-کیچیک گؤل دوران سولاردا قارا چتیرین عکیزینی ایزله میدی. سئوینیردی. آتاسینین چتیری گوللو اولسا دا عاییب دئییلدی، آخی او اوغلان دئییلدی کی.

دلی خانادا آناسی، زکییه یه نه دئسه، زکییه، سوسموشدو. ائله بیل هئچ اونلا دانیشان ائلییه ن یوخودو. آناسی بیراخم میشدی؛ بایاتی اوخوموشدو، ماهنی اوخوموشدو و زکییه نین گۆزلری یاشارمیشدی. زکییه دوداقلارینی بیر-بیرینه سیخمیشدی، گۆزلری یاشارمیشدی و

بیردن نەسە یادینا دوشدویو کیمی چیمخیریب، شووکتین جانینا دوشموشدو. شووکتی دؤیموشدو، اوزونو جیرماقلامیشدی، أمما شووکت قاجیب ائله مەمیشدی. زکیه نى كىپ قوجاقلامیشدی. دؤیولدو كجه آرتیق اونو باغرىنا باسمىشدى و زکیه اوونونجا چابالاسادا نهایت باشینی شووکتین چینینه قویموشدو. اوونموشدو. احد قورخموشدو، چیغیرمیشدی و آخیرا قدر آغلامیشدی. قایداندا شووکتین گوللو چتیری آلتدا گئیدردی. قارا چتیری ایتمیشدی.

□□□

مئترو ایشینی یوسف تاپمیشدی. اوچ-دؤرد آی بوندان قاباق. احد شهری الک-ولک ائدیب، آیاقدان دوشوب، اوتاقدان اوزانیب، آیاقلارینی پنجره نین گون-آلان رفینه دایامیشدی. - أمما بیر ایشده وار. - یوسف بونو دئییه کیتابلارینی اللشدرمیشدی. - نه ایش؟ - فیکر ائله میرم به یه نه سن. - نییه به یه نمییم؟ - آخی سن لیسانس سان. ائله بو خارابادا .. - سئفح دانیشما دی گوروم نه ایش؟ - نظافت ایشی؛ مئترو نظافت چی لیبی. احد دینمه میشدی و پنجره دن گویده اوچان گویرچین لری نظر دن کئچیرمیشدی. - دئمە دیم؟

– نيبه اوزون گئتميرسن؟

– من؟..

دينمه ميشدى. جاوابى بللى ايدى. ايستيخدا م خيړندن كئچميشدى و تاكسى ايشله ديردى. اوچ آى حبس چكندن سونرا، دانيشگاهدان تسويه الماقد ا اينجيتميشديلر بيله سيني. نئچه آى بوش-بوشونا دولانيب نهايت ديپلم مدركى ايله عسگرليه گئتميشدى. احد اونو تبريز پاديگانيندا تاپاندا، ارتيق بير سر جوخه ايدى و كئشيك چكيردى. اوجا بوى و ايدمانچى اندامى وار ايدى.

– سن يوسف نصيرى دئيلسن؟

– يوسف نصيرى يم جناب سروان.

– منى تانيمادين؟

– خئير جناب سروان.

– ۷۸-ده، تير آيى. گئجهسى «آيريليق آيريليق» اوخووردون.

يوسف ساكيت يئره باخميشدى.

– ياديبان گلмир؟

– هه جناب سروان ياديدا اما سيزى تانيماديم.

– من ده ائله اورا ايديم، سنه قولاق آسيرديم. سن تانيماسان دا من تانيبيرام.

احد بير وظيفه افسر اولسادا باجاردىغى قدر يوسفو حيمايه آلتينا آلميشدى. يوسفون دايبى سى حاجى سئيفى موحاربيه ايللرينده جبهه سابيقهسى اولدوغونا گوره، سوزو كئچرلى بير ادام ايدى. اونا-بونا اوز ساليب، نه كوكد يوسفون مدركىنى قورتارميشدى. يوسفون

مدرکی پرونده‌سینه گیریپ، درجه‌سی تطبیق اولانا کیمی عسگرلییین سون گونلری ایدی. یوسف درجه‌لرینی بیر ظفر میدالی کیمی چیین - لرینه تاخیپ بیر گون پادیگاندا دولانمیشدی.

عسگرلیک دن سویوناندا آرتیق صمیمی قارداش کیمی دوستلاشمیشدی‌لار و مئتروداکی بو ایشی ده حاجی سئیفی یوسفون اوز سالماسینا گۆره تاپمیشدی.

یابین آخیر آیی ایدی.

حاجی سئیفی: - سورووشسالار دی کی ساوادسیزام. سیکل - زادام دئییه - رسن. - دئمیشدی.

احد ائله دئمیشدی و همان گوندن «صبای سبز» شیرکتینده قرارداددی اولاراق ایشه گۆتورولموشدو. «صبای سبز»-ین مودورو دئمیشدی:

- صاباحدان ایش باشینا گل! دئمه‌یه سن مئترودا ایشله‌دیم قورتولدو ها! شیرکت شهرده مین بیر یئرین ایشینی گۆتورور. هارا مصلحت بیلسه، اورا گۆندره‌جک. هله‌لیک مئترودا اولارسان. قراردادینی دا ائله صاباحا یازیرام، بیلیرسن دا، معمولن نئچه آی ایشلرله به‌یه‌نسه‌ک قرارداد یازاریق، آما دا نئيله‌مک حاجی سئیفی تاپشیریپ سنی. صاباح آیین نئچه‌سی دی؟

- اون ایکیسی دی جناب!

- یاخشی گئت! تاپشیرمیشام دئیله‌ر نئيله‌یه‌جکسن.

و او گون احدآستا-آستا یاواشلایان یاغیش آلتدا، اوچ آی - دوققوزونجو گون اولاراق ایش باشینا گئدیردی.



ایلک گونلر تئی چکیب، سوپورمک اوره یینی سیخسادا، گئتدیکجه، ایشینه وردیش ائدیردی و اوتانیب، ائله مه سی آزالیردی. اونسوزدا «صبای سبز» ین آرم لی پالتاریندا تانینمادیغینی، ظنن ائدیردی. دؤنه- لره عسگرلیک و یا اویرنجی لیک دوستلارینی گؤرسه ده، اونلار اونو گؤرمه میشدیلر؛ قاچاراق قاپی لارا یویوروب، آغیزلارینا قدر جاماعاتدان دولو قاتارلارا تپلمیشدیلر. مئترو یا گلن لر، دونیانین ان تلسن آدمالاری ایدیلر.

احد هرگون ایش باشینا یئتیشرکن پالتارلارینی ده ییشیب، اؤز ایش منطقه سینه گئدیردی. ایشینین یئری، ساعاتی، فرقلی دورا جاقلاردا، آیری-آیری شیفتلرده، ده ییشیلسه ده، سوپورگه، تئی و جوره جوره زیبیل لر ده ییشیلن دئییلدیلر. احد سوپوروردو، یویوردو، تمیزله بیردی و یئر آتیلان توخوم قابیقلاریندا، بیلیت کاغیذلاریندا، دؤشه مه یه یایشان ساققیز-شاقالات ازیک لرینده و قدغن اولماسینا باخمایاراق؛ مئترو گیره جه بینده یئر آتیلیب تله سیک آیاقلار آلتدا ایچری شوتویه ن سیقارئت کؤک لرینده، اوخویوب دوشوندویو کیتابلار و اییرمی آلتی یاشینا قدر کئچیردی خا طیره لره دوغرو، بیر پاچا آچیب، گونونو کئچیریردی.

سحر دئمیشدی: «دا گئتمز کی»

مسله ائله بوراسیندا ایدی؛ بعضی شئی لری گؤتورمک اولور، بعضی- لرینی سیلمک، بعضی لرینی یوماق، بعضی لرینی حتتا پاکا دا چیخارتماق اولمور یعنی دا گئتمیرلر. آغیرلانیرلار و نفس قاباغینی



کسن بیر شئی کیمی اونوتماق ایمکانینی دا آدامدان آیلرلار. او گون ده مئترویا گیریپ، ایش منطقه سینه یتمک اوچون قاتارا مینمه لی ایدی. سکی یه کئچیب، قاتارا میندی. فورم پالتاریندا نطافتچی لیک ایله، شخصی پالتاردا موسافیر حیسیینده قاتارا مینمه - نین فرقینه دوشوندو و ایلک دفة اولاراق قاتارین ایجباری سوکونو وئردیی تأممولده موسافیرلرین شوشه دالیندان نئجه دالدا قالان سکی لره باخمالارینا، فیکیر وئردی. بو حیسی تکجه مئترودا ایشه گؤتورولن آدام دويا بیلردی.

قاتاردان ائنه نده، دوراجاق ضابطی منصورى اونو گوردو:

- جبارزاده! تو لباساتو عوض نکن! کارت دارم.

احد اوره یینده - آلا ه خئیر ائله سین - دئدی.

- بگیر! این بسته رو بپر حراست، بده به آقای شکوری، بعدش لباساتو بپوش.

بسته نازیک نایلون ایچینده قیرمیزی-ساری خطلری اولان دو یونلو قالین دسمال ایدی. شکورینی اوتاغیندا تاپماق اولاردی، تاپماسایدی یئرینی اؤیره نمک چتین دئییلدی. ان اوزونو یاریم ساعات گؤزله یه بیلردی.

احد الینده کی نایلونا باخدی. گوره سن بو نایلون ایچینده نه واریمیش کی منصورى، سحر ایشه گیرمه دن، اونون آپارماسینی، تکلیف ائتمیشدی. بونو هئچ شراییطده منصورى دن سوروشماق اولمازدی. قایدا بئله دئییلدی و منصورى نین سوؤزو حتتا «صبای سبز» ین مودوروندن ده کئچرلی و ایجرا اولونمالی ایدی.

شكوری نی اوتاغیندا تاپمادی.

-اون بئش ده یقه یه گلر- دئدی.

-ایشین اولسا دی!

- ممنون دؤزه رم.

احد اوتاقددا دورمادی. اوتورماق ایله آراسی یوخودو. سالونا چیخیب آدیم آتماغا باشلادی. بالاشلی آزادلیق منطقه سی ایدی. آغاجلارا، اوجا-اوجا چینارلارا و دووارلارا دیرماشماق اولوردو. قاچیب گیزلنمک اولوردو.

شوؤکت دئمیشدی:

- قیغیلجیم دی یئتمچه، یئره گویه چنگل سالیر.

کلثوم خالا:

-اوغلان اوشاغی بئله اولار دا. بیزیمکی هله قیز خئیلاغی دی، بیر ده-

یقه دیش دورور کی.-دئمیشدی و سؤزو احدثن آذیرمیشدی.

شهر ال ائوینده اولماق آنلامیندا ایدی و احد شهرده هر آن، هانسی

معلوم اولمایان مسله اوزره خیرتده ییندن یایشیل، سورغو-سووالا

چکیلمه سینی گؤزله مک ایضطیرابی، دویوردو. بو حیسسینین

یارانماسیندا آتاسی موصطافا جابارزاده نی موقصیر بیلیردی و هر بیر

بو جاقدان حتتا یوخولاریندادا بئله موصطافا کیشی نین بیردن چیخیب:-

سن بیر الیمه کئچ!-دئمه سینی خاطر لاییردی. بالاشلی آما گئیش

ایدی. ال چاتمایان چینارلاری و بوللو-بوللو قاچیب گیزلنمه یئرلری

واریدی و...

گورونور شكوری یوبانا جاقمیش. احد تووالته گئدیپ ال-اوز یویانا

ياخينا لاشدى. نايونو آسقى دان آسالادى و آينا دا آلتينا دوشن قيريشيقلارى گوردو. نظرينه هميشه قيسا گلن اييرمى آلتى ايل عؤمرو، چوخدا اوزون گلدى. ال-اوزون يويوب، آسقى دان آسالديغى نايون ايچينده كى قيرمىزى-سارى دسمالا باخدى. هئچ كيم يوخودو. نايونو گؤتوروب دسمالين بوش دويونونو آچدى. گؤرونور ائحتياطلا دويونلنمىشدى. ايچينه باخدى. دسمالين ايكينجى قاتيندا الى برک بير شئيه دهيدى. نه گؤروردو؟ قانى، قيريلان يئرلرينده، لخته لنميش اوچ نازيك قادين بارماغى؛ اورتا بارماق، اوزوك بارماق وچچله بارماغى. اورتا و اوزوك بارماقلارى نين ايكي بندى كاميل و بير بندى ياريمچيليق اولسادا چچله بارماقدان تكجه ايكي بند قاليردى. اوزون و سلقه ايله قوورالانميش لاكلى ديرناقلارين بيرينين قيراغى سينيپ، آتمىشدى و بارماقلارين كؤكن ازيليب قوپمالارى بللى ايدى. احدين جانى گيزيلدهدى. بير ساعاتا ياخين بو بارماقلارى اؤزويله گزديرمىشدى. بوفيكيردن سويوق تر جانيني بورودو و تله سيك دسمالى اؤرتوب، نايونا بيراخدى. اللرى تيتره بيردى و ديل دوداغى قوروموشدو. اؤزونو اله آليب اوز-گؤزونه يئنى دن سو چيرپدى. نايونو گؤتوروب ائشيه چيخدى. شكورى گلتمىشدى. نايونو وئريب، نه كؤكده اؤزونو ايش باشينا يئتيردى.


تامام گونو بارماقلارا فيكيرلشدى، اؤزونو قاتار آلتينا آتان قيزا .. نايونا باخماسايدى يقين هئچ نه بيلمه يه جهيدى. آپاريب وئريب گله- جهيدى و بو اوچ آى-دوققوز گون آچيليش-ساكينليك گونلرينين آرديندا عؤمور سوره جهيدى. هر نه اؤز ريواليندا قالا جايدى. آما بو اؤز

ریوالیندا قالما هئچ نهیی ده بیشمه یه جه یدی. فاجیعه فاجیعه ایدی و فاجیعه اولماغینا هئچ کیمین خبرلی اولماغینی گۆزله مییه جه یدی. احد خبرسیز، بارماقلاری اؤزویله گزديرنده ده فاجیعه، فاجیعه ایدی. بیر قیز اؤزونو قاتار آلتینا آتمیشدی و صاباحیسی اونون دؤشه مه ده قالان اوچ بارماغینی، احد بیر ساعاتا یاخین اؤزویله ساخلاسادا، بیر عؤمور یادداشیندا گزديرمه لی ایدی.

فیلمی بیرده ذئهنینده جانلانیدیدی. چهرایی لئچکلی-آغ مانتولو قیز سککی یه یاخینلاشیدیدی. قیز بیر آن دوروخوردو و قاتار ایکی اوچ مئتیرلییه یئتیشرکن... احد نه قدر چالیشسادا بارماقلاری دقیقلاشدیره بیلمیدیدی. بارماقلار ائله ائله سی؛ قیرمیزی-ساری دسمالدا گۆردویو کیمی جانلانیردی یار و..

احد اؤزویله داها هانسی فاجیعه لری گزديرمه سینه دوشوندو و بیردن بیره ایچینده آغیر-آغیر شئی لرین اؤزویله داشیدییینی، دویبدو. بونو تزه جه کشف ائیدیدی، گۆزونه آغیر بیر دنیا اچیلیدی و کشف ائله-دیکجه، دویدوقجا دونیانین ان بؤیوک داشی کیمی، بیر داغ کیمی آغیر و ترینمز اولوردو. یورولموشدو. برک یورولموشدو و اورهیی سخیلیدی.

ایشدن چیخاندا، هاوا توتقون اولسادا یاغیش کسمیشدی.



بالاشلی یا مئترو چکمیشدی لر. احدی سککی یه قویمادی یار. بیلیتچی بالاعمی ایدی و نه قدر احد:-نظافته گئدیرم.-دئسه ده،-قدغن دی.-دئدی لر.

احد دئدی:

- بالاعمی! منم احد.

- هانسی احد؟

- احد دا. احد جاببارزاده.

- احد جاببارزاده؟

- هن احد جاببارزاده، شووکت خانیمین اوغلو.

- شووکتین اوغلو!.. شووکتین اوغلن اوغلو؟

- نئجه اوغلن اوغلو؟! شووکتین ائله بیر اوغلو من ایدیم دا. احد، احد جاببارزاده.

- تانیدیم دا احد. ائله احد جاببارزاده. اولوب دا.

- نئجه یانی اولوب؟!... باخ بیر! منم؛ احد جاببارزاده.

- دئدیم دا اولوب. اینانماسان شووکتین اوزوندن سوروش.

بالا عمی الی ایله دوراجا قدا تئلفون دککه سینده اوجا-اوجا دانیشان

بیر قادینا ایشاره ائتدی. قادینین باشیندا ماوی-یاشیل لئچک واریدی و

اندامینا تاریم چکیلیمیش دار مانتوسونون قوللارینی دیرسه یه کیمی

چیرمالا میشدی. گورونور شووکت چادیرانی یئر قویوب، مودا

باخیردی. احد شووکت یه یاخینلاشدی و مورددهد:

- آنا!.. آنا!... باغیشلا یین خانیم!- سسله دی.

قادین باشینی چئویردی:

- باغیشلا ییم؟ نه یی؟

احد آناسینین بو سرت جاوا بیدان دیسکین کیمی اولدو. داها دقیقله-

شدی. قادین آناسی دئییلدی. شووکت دئییلدی. أمما تانیش ایدی و

ھاراداسا اونو گۆردویوندن امین ایدی.

- باغیشلايين خانیم!

- دئدیم نه یی؟

- هئچ نه یی. من مئترو نظافتچی سی یم. اؤزوده ادم. احد جاببارزاده.

منی سککی یه قویمورلار.

- هانی به سوپورگه ن؟

- قاپی قاباغیندا آلدیلار.

- ائله دی. سککی ده نظافت قدغن دی. احده کی اولوب.

- نئجه یانی قدغن دی؟ نظافت مئترونون لاپ واجیب ایشلریندن

دی.

اونون حنجره سیندن چیخان بو اوتوماتیک جومله نی بوتون مئترو

نظافت چیلری ازبر ایدیلر.

قادین دئدی:

- دوغرو دور. أمما بورا بالاشلی دی بالا. بورادا قدغن دی. منطقه

شرایطی فرق ائدیردا.

احد قادینی تانیدی. دانیسگاه قاباغیندا عیشوه ایله اوجا-اوجا دانیشان

قیز ائله بو ایدی. نه قدر ده زکییه یه اوخشاییردی. دوغرو دور؛ بو قادین،

زکییه و دانیسگاه قاباغی تئلئفون دککه سینده دانیشان قیز، بیر ایدیلر.

بیر نفر ایدیلر و احد نه گئج باشا دوشوردو. بقییه هاردایدیلار؟ قادین

ایچینده ساری-قیرمیزی دسمال اولان نایلونو الینده توولایاراق اوجا-

اوجا دانیشیردی.

احد نایلونو تانییان کیمی اولدو. قاباغا گئدیب دقیقله شدی. اؤزو ایدی.

قادین اهیری-اهیری اونا باخدی.

احد نایلونو گۆستریب:

-بو بارماقلاری گرک شکوری یه یئتیرم.-دئدی.

قادین:-بارماقلار؟-دئییه چیمخیردی:

- هاردان بیلدین؟

سونرا مئترو یوخودو، أمما قادین و اونون دالیجا بالاشلی لی لارین

هامیسی اونو قووالاییردیلار. احد اوجا بیر آغاچ بوداغیندان آسلاندی

أمما یوخاری چیخا بیلمه دی، ائله جه آسیلی قالدی. بوداقدان یاپیشان

الترینه باخدی. سول الینین اوج بارماغی یوخودو. سحر دئدی:

- اؤلونو آغاجینان وورون دوشسون. یوخسا هاممی یا دئییه جک.

احد یالواردی:

- واللاه اؤلمه میشم.. ائله بئله جه باخدیم.. هئچ کسه دئمهرم...

سحر دئدی:

- دئییه جک. واللاه دئییه جک.

احد چیغیردی:

- واللاه دئمهرم... هئچ کسه دئمهرم...

...

- نه یی هئچ کسه دئمهرم سن؟

یوسف ایدی. احدی ترپه دیب، سسله ییردی:

- احد..احد..اویان گوروم!.. یئنه نه قاراباسدی سنی.

دئمک یوخو گورورموش. اویاندی، أمما ائله جه اوزانراق گوزلری سقفه

تیکیلی قالدی.

سونرا يئنه ده ياتدى.

□□□

صباحىسى احد ايش باشيندا ايدى. سيليردى، سوپوروردو، يويوردو و دۆشمه اوسته هر بير نوقطه ايله، هر بير لككه ايله مين بير دونيانى گزيردى. احد يئر باخيردى. اؤز ايچينده ماهنى اوخويوردو، باياتى اوخويوردو و يان-يؤوره سيندن سورعتله اؤتوشن آداملارين ايچينده جوره-جوره تانيدىغى و تانيمادىغى قيافه لرى سئير ائديردى. همين گون دورا قاقلارين بيرينده سوپورمكدن يورولوب، دوو لارين بيرينه سؤيكه نيب، نچه ثانيه ليك دينجىنى آندا، حرکته حاضيرلانان قاتارين ايچينده اونو گوردو. اؤزو ايدى. ائله همان چهرايى لئچكىلى- آغ مانتولو قيز ايدى. اؤزو ايدى. كوپه لرين بيرينه مينميشدى. يئرین آز اولدوغوندان آياق اوسته ايدى و بير تانیش كيمى، مين ايلليک بير تانیش كيمى، احده باخيردى. سونرا قاتار حرکته گلدى. قيز سيخينتى دا اولان باشلار ايچيندن يئنه ده احده باخدى. گولومسه دى. سانكى او قاتار آلتينا آتيلما، او ابدى اوچ قانلى بارماق هئچ واخت و هئچ بير يئرده يوخوموش. احد يئنه ده قيزا باخدى. قيز گولومسه بيردى و اوزاقلاشيردى. احد گولومسه دى. سونرا بالاشلىنى گوردو و يئلين بالاشلىنين قوجا، اوجا و ابدى چينار آغاجلارينين تربتمه سيني.

۱۳۸۶/۹/۱۱